

فريق التفريغ بموقع الطريق إلى الله

يقدم

من سلسلة "كأنك تراه"

عَسَى اللَّهُ أَنْ يَأْتِيَنِي بِهِمْ جَمِيعًا

(باللهجة المصرية)



لفضيلة الشيخ: د. حازم شومان

رابط المادة: <http://way2allah.com/khotab-item-122300.htm>

السلام عليكم ورحمة الله وبركاته، الحمد لله وكفى وصلاةً وسلاماً على عباده الذين اصطفى، أما بعد، تخيلوا يا جماعة لو واحد نزل اشترى لبس ظابط وعلق نسرين ولأ نجمتين ونزل ومشى في الشارع هيحصل إيه؟ هيتبغ عنه وهيتقبض عليه وهيتسجن، ليه؟ انتحال صفة ظابط جريمة يعاقب عليها القانون. أوقال انتحال صفة رب الكون يا جماعة؟! يعني إيه انتحال صفة رب الكون؟! إن حد يوهمك إن في إيدته سعادتك، إن حد يوهمك إن في إيدته تحقيق أحلامك، إن حد يوهمك إن في إيدته رزقك.

فقط الله هو من يستطيع تحقيق أحلامك

"عَسَى اللَّهُ أَنْ يَأْتِيَنِي بِهِمْ جَمِيعًا" يوسف:83، الوحيد اللي في إيدته تحقيق كل طموحات حياتك وحياتك هو رينا - سبحانه وتعالى-، برجاء الانتباه، يا جماعة القانون لا يحمي المغفلين، يا إخواننا الحياة أقصر من أن نضيعها على باب المخلوق، على باب من لا يرحم، ومن لا يقدر، تعالوا نعيش في جنة قول الله: "عَسَى اللَّهُ أَنْ يَأْتِيَنِي بِهِمْ جَمِيعًا".

"عَسَى اللَّهُ أَنْ يَأْتِيَنِي بِهِمْ جَمِيعًا" الدرس ده احنا بنتكلم فيه عن إيه؟ يا جماعة سبب همّ الناس في الحياة كل واحد فينا:

1. يا إما واحد عنده مشاكل مش قادر يحلها.

2. يا إما واحد عنده طموحات مش قادر يحققها.

اللي عنده مشاكل مش عارف يحلها عملناله درس: "فَلَا كَاشِفَ لَهُ إِلَّا هُوَ" الأنعام:17 علشان نقوله إن محدش يقدر يحل لك مشاكلك إلا رينا، واللي عنده طموحات مش قادر يحققها عملناله الدرس ده: "عَسَى اللَّهُ أَنْ يَأْتِيَنِي بِهِمْ جَمِيعًا" علشان نقوله محدش يقدر يحققك طموحاتك غير رينا، محدش يقدر يحققك أحلامك غير رينا.

إلى من يتحدث الشيخ؟؟

الطموحات هي أكبر سبب عطل الإنسان عن رينا، دائماً الشباب الطموح اللي عايز ياخذ شهادات ويوصل لل high standard level متهيأله إن الدين إعاقة بالنسبale.

علشان كده أنا بكلم النهارده مين؟ أنا بكلم نخبة الأمة، بكلم الأوائل على الكليات، بكلم الشباب اللي عايز يبقى من المخترعين المبدعين في الأمة، بكلم الشعراء والفنانين اللي عندهم ميول فنية وطاقات عالية، بكلم نخبة الملتزمين

اللي عايزين يبقوا دعاة وعلماء، بكلم نخبة الملتزمات اللي عايزين يعملوا حاجة لنصرة دين ربنا، أنا بكلم قادة الغد يا جماعة، وبكلم اللي عندها أحلام وعنده أحلام، بينماوا 3 ساعات راسهم على المخدة مش عارفين يناموا من كتر ما بيحلموا بالأحلام اللي مكبوتة اللي جوا قلبهم.

أنا بكلم كل دول بقولهم: **نص ساعة على باب الخالق توفّر عليكم سنين مع الأسباب**، نص ساعة قبل الفجر على باب الخالق توفّر عليكم **آلام السنين وجهد السنين**، أنا عايز أقولكم مين اللي يقدر يحقّقك طموحك.

مع الله لا شيء مستحيل

تعالوا نعيش مع الرحلة الممتعة دي، تعالوا نعيش مع الشعارات القرآنية العظيمة اللي تنورلنا حياتنا بالقرآن، لكل إنسان طموح، القرآن بيكلمك يا كل واحد طموح بيقولك: **مع الله لا شيء مستحيل**.

"فَسَخَّرْنَا لَهُ الرِّيحَ" ص:36، هوّ الوحيد اللي يقدر مهما كانت طموحاتك، يعني طموحاتك إيه؟ طموحاتك إيه؟ شهادة، فلوس، شقة في مكان راقى، عايز تبقى داعية، عايزة تطلي علم، طموحاتك إيه؟ إنّ البحر يتشقلك! شوفوا ربنا حقق طموحات الصالحين قدّ إيه، يا إخواننا سيدنا سليمان بيقول: **"هَبْ لِي مُلْكًا لَا يَنْبَغِي لِأَحَدٍ مِّنْ بَعْدِي" ص:35**، الله!! هوّ إنّ أنا أطمح مش حرام؟! سيدنا سليمان طلب من ربنا طموح وربنا حققهوله، ربنا بيقول: **"فَسَخَّرْنَا لَهُ الرِّيحَ"**، إيه طموحك يعني؟ إنّ ربنا يسخّرلك حركة الرياح على وجه الأرض!؟

سيدنا داوود ربنا -سبحانه وتعالى- اداله الملك وهوّ عنده 31 سنة، سيدنا داوود ربنا حقّله كل طموحاته وأحلامه، وأطلقه الجبال والطير، إيه الطموحات بتاعتك يعني؟! سيدنا أيوب ربنا أمطر عليه السما ذهب، أمطر عليه جراد من ذهب، سيدنا محمد ربنا رفعه سدرة المنتهى، سيدنا موسى ربنا شق ليه البحر الأحمر، إيه الطموحات بتاعتنا؟! علشان كده عايزين نخرج من الشعار الأولاني **"فَسَخَّرْنَا لَهُ الرِّيحَ"** إنّ ربنا يقدر يحقّقك أيّ طموح ومحدش يقدر غير ربنا بس افهم قول رسول الله -صلى الله عليه وسلم- في صحيح مسلم **"..أنا بك وإليك.."** أنا بيك يا رب، إنت الوحيد اللي تقدر تغني، إنت الوحيد اللي تقدر تحقّق أحلامي، إنت الوحيد اللي تقدر ترفعي.

ثقتك بخالقك تصنع المستحيلات

"عَسَى اللَّهُ أَنْ يَأْتِيَنِي بِهِمْ جَمِيعًا" وتحققت الأحلام، سيدنا يعقوب يوم ما قال الكلمة دي يا جماعة كان ولد من أولاده بقاله أربعين سنة تايه منه وضايع منه، وولد تاني من أولاده في دولة تانية مايعرفش عنه حاجة اللي هوّ بنيامين، وأولاده متفرقين ما بين مصر والشام، وهوّ اتعمى وفقد بصره، في اللحظة دي قال لأولاده: **"عَسَى اللَّهُ أَنْ يَأْتِيَنِي بِهِمْ جَمِيعًا"**، أنا عندي طموح إنّ ربنا يجييلي كل حاجة مع بعضها في لحظة واحدة! أولاده قالوا عليه مجنون، أولاده اتهموه بالجنون!!

ما أروع أن تحلم .. لكن احذر أن يتحول الحلم لعقبة بينك وبين خالقك

عارف معنى كده إيه؟ معنى كده إن ربنا بيقولك احلم، معنى كده إن ربنا بيقولك الطموح مش غلط حتى لو في الدنيا، الطموح في الدين والدنيا شيء عظيم يا جماعة، أهل الطموح هم قادة المستقبل، الطموح يبقى مش غلط لو ماتحوّلش لعقبة بينك وبين ربنا، لو اتحول لسلمة بتقربك من ربنا.

جميل قوي إن يبقى نفسك تطلع الأول على الدفعة، جميل قوي إن يبقى نفسك إنك تبقى مخترع عظيم يفيد الأمة، جميل قوي إن يبقى نفسك إنك تبقى داعية كبير ينصر الإسلام، جميل قوي إن يبقى نفسك إنك تبقى عالم في الشريعة، جميل قوي إن يبقى نفسك إنك تعمل حاجة كبيرة قوي لدين ربنا قبل ما تموت، جميل قوي يا جماعة.

زي سيدنا ذكريا قال: **"فَهَبْ لِي مِنْ لَدُنْكَ وَلِيًّا"** مريم:5، طموحه في ابنه إنه يبقى من أولياء الله، طموحه إن ربنا يديله ولد يوحد الأمة ويقضي على التمزيق بتاعها، السيدة أم مريم، السيدة حنة أم مريم كانت بتقول: **"إِنِّي نَذَرْتُ لَكَ مَا فِي بَطْنِي مُحَرَّرًا"** آل عمران:35، أم مريم يا جماعة كان طموحها إن ربنا يرزقها ولد يجر المسجد الأقصى من أسر الرومان، جميل قوي إن احنا نبقي طموحين.

سيدنا يعقوب لما حلم ولما طمح إيه اللي حصل؟ ربنا اداله ابنه، رجعله يوسف، واداله ملك مصر، ورجعله بصره وهدى ليه أولاده، ووحدله أولاده وخلاهم أنبياء، لحد دلوقتي اسمهم بني إسرائيل، إسرائيل اللي هو سيدنا يعقوب، جميل قوي، وتحققت الأحلام.

اصدق الله .. فيصدقك الله

"يَأْتِ بِهَا اللَّهُ" لقمان:16، أحلامك عندنا، أحلامك عندنا، أحلامك دنيا أو دين عند ربنا - سبحانه وتعالى-، أحلامك دنيا أو دين، لو الأحلام دين يا جماعة، أرقى أحلام دينية في الحياة إيه؟ سيدنا عمر وهو بيقول: **"اللهم ارزقني شهادة في سبيلك، وموتة في بلد نبيك"** يا عمر بن الخطاب ده إنت دلوقتي امبراطور على مستوى العالم والمدينة المنورة العاصمة، أقوى بلد على مستوى الأرض، ازاى تموت شهيد فيها؟! القتال بعيد عن المدينة، ازاى تموت في المدينة وتموت شهيد؟! ربنا رزقها ليه يا جماعة.

زي الصحابي اللي هو راح للنبي - عليه الصلاة والسلام - قاله: **"إِنَّمَا اتَّبَعْتُكَ عَلَى أَنْ أُضْرِبَ بِسَهْمٍ هَاهُنَا؛ فَأَمُوتَ فَأَدْخُلَ الْجَنَّةَ"**، شوية وجايين للنبي - عليه الصلاة والسلام - جنة، واحد مقتول وسهم داخل من رقبته من الناحية دي خارج من الناحية الثانية، النبي - عليه الصلاة والسلام - بيقولهم: هو؟! هو ده اللي كان جاي دلوقتي بيقول عايز أموت بسهم هنا؟ قالوله هو يا رسول الله، قالهم: **صدق الله، فصدق الله.**

طموح زي ربيعة بن كعب الأسلمي، فقير بس طموح، النبي بيقوله: **"..سَلِنِي فَقَلْتُ مِرَافِقَتَكَ فِي الْجَنَّةِ..."** صححه الألباني، يا ربيعة اطلب أكلة حلوة، حاجة تلبسها في رجلك، لقمة تتعشى بيها، أنا عايز أبقي في الفردوس الأعلى معاك يا رسول الله.

سيدنا موسى **"رَبِّ أَرِنِي أَنْظُرْ إِلَيْكَ"** البقرة:143، الطموح بالنظر لوجه الله، الطموح بالفرديوس الأعلى، الطموح بالشهادة في سبيل الله، الطموح بحسن الخاتمة، أحلامك عندنا، **"يَأْتِ بِهَا اللَّهُ"**.
 طيب لو الطموحات دُنْيَوِيَّة؟ سيدنا موسى يقول: **"رَبِّ إِنِّي لِمَا أَنْزَلْتَ إِلَيَّ مِنْ خَيْرٍ فَقِيرٌ"** القصص:24، شاب مطرود من مصر، مُطَارِد، مش متجوز، ماعندهوش شغلانة، ماعندهوش شقة يسكن فيها، زي أيّ شاب عايز 3 حاجات: شقة، جواز، وظيفة، في سورة القصص ربنا اذّاهله في لحظة واحدة، ربنا اذّاله الشقة والوظيفة والجواز في لحظة واحدة، في موقف واحد بس لما سقى للفتاتين، في سورة القصص أحلامك عندنا.

ما يدبره لك الله .. هو الخير

أعرف دكتور في الجامعة في كلية صيدلة، الدكتور ده يعني كان قاعد معايا مرة في جلسة الضحي وقاعد يدعو الشباب، فيقول: أنا وأنا في الثانوية العامة جبت مجموع صيدلة ولكن ماكانش فيه صيدلة في البلد بتاعتنا، كان لازم أروح القاهرة، لم أكن أملك شيء، اضطريت أدخل كلية ثانية مش عايزها في بلدنا، سقطت أول سنة من الإحباط، فتحوا السنة اللي بعدها صيدلة في بلدنا دخلت فيها بالمجموع بتاع السنة اللي قبلها كان ده الشرط بتاعهم، ولكن حصل لي ظروف سقطت في أول سنة في كلية صيدلة، اتخطمت أحلامي؛ لإني كان نفسي أتعيّن في الجامعة وأول دفعة همّ اللي بيعينوها كلها علشان لسه الكلية جديدة.

أول دفعة حصل تزوير في آخر سنة في الكنترول، مجلس الجامعة قرر عدم تعيين حد إلا اللي جابوا مرتبة شرف، كانوا قليلين، الدفعة الثانية اللي هوّ كان فيها خدوا معظم الدفعة، خدوا 37 واحد، هو دلوقتي أستاذ في كلية صيدلة، يا إخواننا أحلامك عندنا **"يَأْتِ بِهَا اللَّهُ"**، **"فَسَحَّرْنَا لَهُ الرِّيحَ"**، **"عَسَى اللَّهُ أَنْ يَأْتِيَنِي بِهِمْ جَمِيعًا"**.

الله - عز وجل - لا يتعاضمه شيء

إنّ الله لا يتعاضمه شيء، ولا في الأحلام، أنا عايز أكلمكم في النقطة دي عن عطاءات الله، العطاءات الدنيوية الجبارة للصالحين، يعني ربنا مش ادى للصالحين إيمان و يقين وعافية، فيه عطاءات دنيوية جبارة، ربنا خلّى عباده ملوك زي سيدنا داوود، زي سيدنا سليمان، خلّاهم وزراء زي سيدنا يوسف، خلّاهم ملتي مليونيرات زي سيدنا أيوب مطرّ عليه السما ذهب، خلّاهم مخترعين عظماء زي ذو القرنين، وزى سيدنا داوود.

ربنا يا جماعة لما انشغلوا بيه اذّاهم من الدنيا أكثر من اللي انشغلوا بالدنيا، ولا في الأحلام يا جماعة، ربنا قادر، سيدنا سليمان **"إِذْ عَرِضَ عَلَيْهِ بِالْعَشِيِّ الصَّافِنَاتُ الْجِبَادُ"** ص:31، عشرين ألف فرس رافعة رجل وواقفة على 3 رجول بمليارات مُمْلِيَرَة، جايم منين؟!

سيدنا داوود بقى ملك، أنا جايلكم المصحف معايا؛ علشان الصفحة الثانية من سورة ص، يا إخواننا صفحة 454 في المصحف أنا قاصد أفتح المصحف علشان إنتم بعد الحلقة أو في الحلقة تفتحو معايا الصفحة الثانية من سورة ص،

صفحة واحدة، لعبد واحد، شوفوا ربنا أدّاه إيه: "إِنَّا جَعَلْنَاكَ خَلِيفَةً فِي الْأَرْضِ" ص: 26، "وَإِنَّ لَهُ عِنْدَنَا لَزُلْفَىٰ وَحُسْنَ مَّآبٍ" ص: 25، "إِنَّا سَخَّرْنَا الْجِبَالَ مَعَهُ" ص: 18، "وَالطَّيْرَ مَحْشُورَةً كُلٌّ لَهُ أَوَّابٌ" ص: 19، "وَشَدَدْنَا مُلْكَهُ وَأَتَيْنَاهُ الْحِكْمَةَ وَفَصَّلَ الْخِطَابِ" ص: 20، كل دي عطاءات لواحد بس!! أحلامك عند ربنا، الوحيد اللي يقدر. "اجْعَلْنِي عَلَىٰ خَزَائِنِ الْأَرْضِ" يوسف: 55، ربنا حققهاله.

لا ترضى بالدُّونِ في الآخرة .. كما لم ترضى به في الدنيا

أخيراً يا جماعة "وَمِن دُوْهِمَآ جَنَّاتٍ" الرحمن: 62، الناس اللي عندها طموحات جبارة ربنا نَزَّهَم سورة الرحمن، سورة الرحمن بتكلم الناس اللي هتتجنن من الطموحات الدنيوية، سورة الرحمن "وَلَهُ الْجَوَارِ الْمُنشَآتُ فِي الْبَحْرِ كَالْأَعْلَامِ" الرحمن: 24، اللي عايزين يبتغوا سفن عملاقة زي الجبال، "إِنِ اسْتَطَعْتُمْ أَن تَنْفُذُوا مِنْ أَقْطَارِ السَّمَاوَاتِ" الرحمن: 33، اللي عايزين يعملوا برامج حرب كواكب، ويبتغوا صواريخ، ربنا كلمهم في الرحمن عن حاجتين:

1. الحاجة الأولانية، النص الأولاني من الصورة: نَعَمْ ربنا، كَإِنَّ ربنا يقول للإنسان الطموح أنا مش ضدك، أنا مش ضدك، ده أنا ادّيتك من قبل ما تسأل، وادّيتك من قبل ما تعبدني، لو عبدتني هحققك طموحاتك.
2. الحاجة الثانية اللي ربنا اتكلم عنها: أطول سورة في القرآن اتكلمت عن مقامات الجنة، عن الفرق بين نعيم السابقين، ونعيم أصحاب اليمين، "وَمِن دُوْهِمَآ جَنَّاتٍ"، يعني عيب إنك في الدنيا تبقى مابتقبلش غير بالنجوم، وفي الآخرة راضي بالدُّون!!.

"وَمِن دُوْهِمَآ جَنَّاتٍ" ليه؟؟ ماتخليك "وَلَمَنْ خَافَ مَقَامَ رَبِّهِ جَنَّاتٍ" الرحمن: 46، "ذَوَاتَا أَفْنَانٍ" الرحمن: 48، "فِيهِمَا مِنْ كُلِّ فَاكِهَةٍ زَوْجَانِ" الرحمن: 52، الثانية: "فَاكِهَةٌ وَنَخْلٌ وَرُمَّانٌ" الرحمن: 68، فرق رهيب.

دي "كَأَنَّهُنَّ الْيَاقُوتُ وَالْمَرْجَانُ" الرحمن: 58، دي "خَيْرَاتٌ حِسَانٌ" الرحمن: 70، دي "عَيْنَانِ تَجْرِيَانِ" الرحمن: 50، دي "نَضَّاحَتَانِ" الرحمن: 66، دي "ذَوَاتَا أَفْنَانٍ"، دي "مُدْهَامَّتَانِ" الرحمن: 64، فرق كبير قوي يا جماعة، فرق كبير، كَإِنَّ ربنا يقول لكل واحد طَمُوح اطمح بس طموحك مايشغلكش عني، وطموحك مايشغلكش عن الطموح في الجنة.

خزائن الله واسعة لا تنفذ

ياللي عايزين high standard level خزائن ربنا فيها شقق في قصر في أرقى أماكن، خزائن ربنا فيها ذهب ومجوهرات، خزائن ربنا فيها وظائف في الجامعة، خزائن ربنا فيها إنّ ولادك يدخلوا international schools، خزائن ربنا فيها دولارات، حتى لو الدولار بقى بعشرين جنيهه، والريال بقى بعشرة جنيهه، خزائن ربنا مليانة يا جماعة.

التوصيات

التوصيات النهائية عايزين نقول إيه؟ "عَسَى اللَّهُ أَن يَأْتِيَنِي بِهِمْ جَمِيعًا" الوحيد اللي يقدر يحققك أحلامك.

- التوصية الأولى

عكس المتوقع مش هقولك خلي طموحاتك عالية ماتطمحش في دنيا، ماتطمحش في جواز، ماتطمحش بوظيفة، لأ اطمح، اطمح زي ما إنت عايز بس على شرط: إنك إنت ماتبقاش عبد لطموحك بدل ما تبقى عبد لله. سليمان طمح، كان نبي من الأنبياء بس لما الخيل عطّلته عن ذكر ربنا دبحها، ليه؟ الكلمة اللي واحد من شيوخه قالها لي زمان: أي حاجة هتروح من حياتك وهييجي مكانها ربنا إنت الكسبان، اوعى طموحك يحولك من عبد لله لعبد للطموح.

- التوصية الثانية

إنت عارف يعني إيه ربنا يحققك طموحك؟؟ يعني شجرة حياتك يطلعها ثمرات، يعني ربنا يباركلك في عمرك، معظم الناس دول كلهم ماتوا وهيموتوا وأحلامهم مش هتتحقق ومش هيعملوا إنجاز كبير في الحياة. اشعنا إنت اللي ربنا يخليك تعمل إنجاز كبير في الحياة؟! ربنا هيباركلك في عمرك، يبقى اديله عمرك، يبقى ادي لربنا من عمرك، أنا بك وإليك، خليك مؤمن بالله هو اللي بينيك وهو اللي يعليك.

كنز عظيم .. فلنتعاهد على المحافظة عليه

هعلمكم دعاء قبل ما أسبيكم بإذن الله -تعالى- لو واطبتم عليه، حبّايه، حبّايه **twice daily**، مرتين مرة الصبح ومرة بالليل، بعد الفجر وبعد العصر، إيه الحباية اللي النبي -عليه الصلاة والسلام- علّمها للسيدة فاطمة وأصر على السيدة فاطمة بيها؟

"..يا حيُّ يا قيُّومُ بِرَحْمَتِكَ أَسْتَغِيثُ أَصْلِحْ لِي شَأْنِي كُلَّهُ...". إسناده صحيح واخدين بالكُم؟ "أصْلِحْ لِي شَأْنِي كُلَّهُ وَلَا تَكِلْنِي إِلَى نَفْسِي طَرْفَةَ عَيْنٍ...". أَصْلِحْ لِي شَأْنِي كُلَّهُ.

"يا حيُّ يا قيُّومُ" يا من أنت قائمٌ على كل شيء، "بِرَحْمَتِكَ أَسْتَغِيثُ" أسألك برحمتك التي وسعت كل شيء، "أصْلِحْ لِي شَأْنِي كُلَّهُ" أن تُصْلِحَ لِي كُلَّ شَيْءٍ، "وَلَا تَكِلْنِي إِلَى نَفْسِي" ولا تكلني إلى التي أفسدت عليّ كل شيء، يا رب "أصْلِحْ لِي" علشان خاطري يا رب، العشم في ربنا، زي أصلح لي في ذريتي كده، "شَأْنِي كُلَّهُ" ذرّة التراب دي أنا مقدرش أصلحها كل شئونها؟! إنت إيه بالنسبة لربنا؟

"..فَإِنَّ اللَّهَ لَا يَتَعَاظَمُهُ شَيْءٌ أَعْطَاهُ" صحيح مسلم، ربنا يا جماعة مايصعبش عليه إنه يدّي، ربنا ادي ملك، مايصعبش عليه، ربنا يا جماعة ممكن يدّي أي حاجة، ده حديث النبي -عليه الصلاة والسلام-، لا يتعاضمه شيء أعطاه، اطلبي، اطلب من ربنا، ربنا يقدر يدّي كل حاجة ويرضى، كريم يا رب.

"أصْلِحْ لِي شَأْنِي كُلَّهُ وَلَا تَكِلْنِي إِلَى نَفْسِي طَرْفَةَ عَيْنٍ" خلّوا الدعاء ده نبراس لحياتكم، إن ربنا يحلّ ليكم مشاكلكم، إن ربنا يحققلكم طموحاتكم طول ما إنتم مواظبين على الدعاء ده بالصبح وبالليل، تيجوا يلاً؟ تيجوا ندعي الدعاء ده مع

بعض من قلبنا ونتعاهد إن احنا كل يوم الفجر والعصر ندعي بيه زي ما النبي -عليه الصلاة والسلام- علم السيدة فاطمة؟

دعاء الخاتمة

يا حيّ، يا حيّ يا قيّومُ بِرَحْمَتِكَ نَسْتَغِيثُ، أَصْلِحْ لَنَا شَأْنَنَا كُلَّهُ، وَلَا تَكِلْنَا إِلَى أَنْفُسِنَا طَرْفَةَ عَيْنٍ، يَا حَيُّ يَا قَيُّومُ بِرَحْمَتِكَ نَسْتَغِيثُ، أَصْلِحْ لَنَا شَأْنَنَا كُلَّهُ، وَلَا تَكِلْنَا إِلَى أَنْفُسِنَا طَرْفَةَ عَيْنٍ، اللَّهُمَّ آمِينَ، اللَّهُمَّ آمِينَ.

سبحانك اللهم وبحمدك، أشهد أن لا إله إلا أنت، أستغفرك وأتوب إليك، وجزاكم الله خيرا.

تم بحمد الله

شاهدوا الدرس للنشر على النت في قسم تفرغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>